

2015-imi Inatsisartut ukiakkut ataatsimiinnissaannut Nuussuarmi Upernaviup nunaqarfiisa ilaanni nutaamik illu sullivimmik nakorsiartarfittalerlugu sananermut atatillugu pissutsinik aningaasatigullu tunngasunik misissuinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Hans Enoksen, Partii Naleraq)

Siullermeerneqarnera

Inatsisartunut Ilaasortap Hans Enoksenip Partii Naleqqamiit siunnersuutaa Naalakkersuisullu akissuteqaataat Partii Naleqqamiit imannak oqaaseqarfigissuarput.

Qujanarpoq Partii Naleqqamiit Inatsisartunut Ilaasortap Hans Enoksenip Upernaviup pigisaani Nuussuarmi nakorsiartarfeqarnermut illu sulliveqarnermullu tunngasut ajorsilluinnarsimasut pillugit Inatsisartuni misissuisoqarnissaa siunnersuuteqarfigimmagit.

Aap Partii Naleqqamiit paasivarput qujanartumik maannakkorpiaq Nuussuarmi sulisunut inissiaq atorpeqanngitsoq nutarterlugu nakorsiartarfimmik kigutilerivittalimmik suliaqartoqartoq. Tassunga tunngasoq aamma Nuussuarmiut ilaannik attaveqarnitsinni naammaginartutut nalilerneqartoq ajorinngilarput.

Kisianni Illu Sulliveqarnermut tunngasortaa kommunimut akisussaaffigisassanngorlugu Naalakkersuisuniit “milorujutiinnaarneqarnera” Partii Naleqqamiit akuersaarsinnaanngilarput.

Minnerunngitsumik soorlu Inatsisartunut Ilaasortap Hans Enoksenip siunnersuuteqarnermini oqaatigimmagu meeqqat, inuusuttut, inersimasut utoqqaallu eqqiluisaarnikkut annertuumik pisariaqartimmassuk, tassami nunaqarferujussuarmi pineqartumi kuuginnartumik illut amerlanerpaat imeqanngillat, taamaattumillu nunaqarfimmi peqqinnissaq eqqarsaatigalugu illu sullivik aamma pinngitsoorneqarsinnaanngimmat.

Tassami maannakkut illu sullivik suli atorpeqarpoq, kisianni malunnartumik innarleriartorluni, tassami illu sullivimmi uffartoqartillugu imeq naqqup iikkallu katinnerisa nikinnerisigut silamut kuuttarpoq, taamaanneranilu suli aserfallakkiartornera annertusiartorluni.

Partii Naleqqamiit nalunngilarput qanga illut sulliviit nakorsiartarfiillu sanaartorneqalermata kommunit, taamanikkullu Namminersornerullutik Oqartussat avitseqatigiillutik aningaasalersorsimagaat.

Taamaammat Partii Naleqqamiit kaammattuutigaarput Naalakkersuisut Nuussuarmi pissutsit qanoq ajortigisut paasereerlugit Qaasuisup Kommunια peqatigalugu ajornartorsiutit iluarsineqarnissaa sulissutigissagaat.

Taama Partii Naleqqamiit oqaaseqarluta suliap aappassanneerreqannginnerani ataatsimiititaliami susassaqartumi sularineqarnissaa inassutigaarput aamma siunnersuutip qulequtaata allanngortinneqarsinnaaneranut oqaloqataanissarput piareersimaffigaarput, kisianni tassa pingaarnerpaajuvoq Nuussuarmi ajornartorsiutigineqartut iluarsivigineqarnissaat ilaannai pinnagit, kisannili aamma illu sulliveqarnermut tunngasut ilanngullugit.

Anthon Frederiksen